

Ha'u nia Respeitus ba:

- **Sua Exelénsia Sekretáriu Stilwell**
- **Sua Exelénsia Merício Juvinal dos Reis 'Akara', Sekretáriu Estado Komunikasaun Sosiál**
- **Delegasaun husi DLA Piper**
 - **Reprezentante Estado MA Sua Exelénsia Tony Cabral, Senadór Estado MA Sua Exelénsia Marc Pacheco, Juis Doutór Phillip Rapoza no Doutór Iskander Rehman husi Pell Center**
- **Membru sira husi Imprensa**

Ha'u sente onrada prezente iha Timor-Leste iha momentu ne'ebé ita-boot sira komemora aniversáriu referendu ba dala 20. No ohin ha'u kontente hodi introdús amiania Sekretáriu Stilwell husi Ministériu Negósiu Estranjeiru Estados Unidos Amérika.

Sekretáriu Stilwell lidera polítika diplomátika no operasaun sira iha rejiaun Ázia Leste no Pasífiku. Nia tama iha Ministériu Negósiu Estranjeiru Estados Unidos Amérika hafoin serbí iha Forsa Aérea durante tinan 35. Nia serbí ona Estados Unidos Amérika nu'udar linguística, pilotu aviaun-funu, komandante, no akadémiku. Nia hetan Departamentu Defeza nia prémiu Superior Service Award iha tinan 2015.

Ha'u hatene ha'u koalia representa ita nain rua bainhira ha'u dehan katak Estados Unidos Amérika admira tebes ho povu Timor-Leste nia luta ho aten-barani ba ukun-rasik-an.

Ami mós sente orgullu ho Amerikanu sira ne'ebé uluk iha ne'e hamutuk ho Timoroan sira, eduka votante sira, obzerva referendu, fornese ajuda umanitária, no harii fila-fali eskolas no sentru saúde sira. Amerikanu sira ne'e ho barani tubarai metin hamutuk ho Timoroan sira hasoru intimidasaun no ameasas husi violénsia.

Ohin ha'u hakarak partilla istória ida husi Amerikanu sira ida ne'ebé uluk iha Dili iha tinan 20 liubá.

Imi balun karik koñese ona jornalista Marie Colvin. Nia uluk nu'udar jornalista-deguerra ida ne'ebé hakerek ba London Sunday Times. Infelizmente nia hetan oho husi rejime Síria iha tinan 2012 bainhira halo kobertura ba serku iha Homs, Síria.

Marie Colvin hakarak hatudu oinsá funu nia konsekuénsias aat ba povu babain sira. Nia

dehan nune'e, "Halo kobertura ba funu signifika ba iha fatin sira ne'ebé rahun tanbá situaun rungu-ranga, destruisaun, mate no moras, no koko sai sasin ba buat ne'e. Ha'u preokupa ho esperiénsia husi ema sira diretamente afeta husi funu, ema-hirak ne'ebé ema haruka ba funu no hirak ne'ebé koko atu sobrevive."

Bainhira Colvin too iha Dili iha fulan Setembru tinan 1999, jornalistas hamutuk 26 deit maka mantein iha Timor-Leste. Tanba Estrada sira perigozu tebes, entaun sira hela deit iha UNAMET nia sede hamutuk ho estranjeiru sira seluk no refujiadu Timoroan sira. Sede ONU nian simu ema besik 2,000 - no iha dalan sai ida deit. Sasán nesesidade sira menus lalais deit, no situaun sai susar tebes. ONU anunsia katak sira sei evakua sira-nia funsionáriu sira.

Maioria jornalistas estranjeiru sira hili hodi evakua – maibé lá'os Marie Colvin. Nia kolega sira relata katak nia hiit kabas no dehan, "Lae, ha'u sei la sai. Ida ne'e istória boot liu iha mundu." Ema hotu iha sede ne'e hatene katak Nasoens Unidas nia evakuasaun sei hamosu perigu boot ba sira-nia moris. Colvin até telefone ba nia feton hodi dehan adeus. Depois nia dehan tan, "Ha'u labele sai. Ita sei hela hamutuk ho povu durante loron haat ka lima, toba besik sira, haan etu ho sira... moralmente sala, se ita abandona sira no dehan adeus no ema sira ne'e hatene katak sira sei hetan oho no mate. Ne'e lá'os desizaun kontráriu ne'ebé maka ha'u bele halo."

Marie Colvin telefone ba nia editor fó hatene katak nia sei hela. Só jornalistas nain rua seluk tan, rua ne'e hotu feto, maka hela ho povu: Minka Nijhuis no Irena Cristalis. Situaun ne'e susar tebes, maibé Colvin mantein barani no profisionál. Iha nia reportajen, nia deskreve serku ba sede ne'e no ataka sistemátiku husi milísias no militar sira. Testemuña sira-nia sasin ne'e fó presaun boot ba comunidade internasionál. Hafoin loron haat iha serku nia laran, refujiadu sira hetan dunik evakuasaun. Colvin hanoin hikas ho orgullu, "ha'u hamoe ema sira ne'ebé foti desizaun no ha'u sente di'ak tanba ne'e salva vida barak."

No Primeiru Ministru Xanana Gusmao dehan, hafoin Colvin nia mate, "Ita nia feton, Marie Colvin, hatudu aten-barani boot iha nia servisu no sentidu humanidade profundu hasoru violénsia no ódiu. Ita sei nafatin lembra nia prontidaun hodi sakrifika nia moris rasik hodi proteje Timoroan 1,500."

Jornalizmu la sempre dramátiku hanesan ne'e. Maibé jurnalizmu sempre importante. Marie Colvin hatete ne'e ho di'ak tebes: "Ami nia misaun maka koalialia lia loos ba ukun-nain sira. Ami haruka ba ami nia nasaun primeiru relatu istóriu ida."

Jornalizmu di'ak fó ba ema hotu informasaun ne'ebé sira presiza hodi halo desizaun

sira ne'ebé di'ak no halo sira-nia líder sira responsabiliza – signifika katak sira bele serbisu ho efetivu liutan ba justisa no direitus umanus, no reprezenta ho di'ak husi sira-nia governu.

Tanba ne'e maka jurnalizmu livre, independente maka pilar ida husi demokrasia, no razaun tansá Estadus Unidus sente orgullu hodi apoia jornalista sira iha mundu tomak. Iha Timor-Leste ita haree ona respeito profundo ba jornalista sira hotu ne'ebé konta ita-boot sira-nia istória no bolu atensaun mundu nian ba Timor-Leste nia aten-barani no sofrimentu durante tempu Rezisténsia. Ami sente haksolok tebes rona katak Marie Colvin sei hetan omenajen husi Governu Timor-Leste ho prémiu ida ba nia barani no dedikasaun.

Embaixada Estadus Unidus Amérika hakarak fó onra no halo tuir jornalista sira ne'e nia kompromisu ba nasaun ne'e. Bazeia ba espíritu ne'e, ami apoia jurnalizmu iha Timor-Leste liuhusi ami nia eventu meza kabuar ba jornalista hanaran KLABIS. Ami iha programas barak ne'ebé foka ba aprendijazen lian Inglés no hanorin lian Inglés. Ami mós apoia ona formasaun profisionál ba radio comunidade. No ohin ami sei lansa iniciativa foun ida naran: Bolsa-estudu Lian Inglés ba Jurnalizmu nu'udar Omenajen ba Marie Colvin.

Bolsa estudo ne'e sei fornese ba jornalistas Timoroan nain 6 formasaun lian Inglés durante tinan ida. Abilidades lian Inglés sei fó ba sira asesu ba fontes oin-oin ne'ebé barak, no prepara sira hodi hatoo informasaun foun ba sira-nia audiénsia Timoroan sira. Ami hakarak kontinua programa ne'e ba tinan barak tuir mai.

Ami hein katak resepiante sira husi bolsa-estudu ne'e inspiradu husi aten-barani no profesionalizmu Marie Colvin nian, no katak sira, hanesan mós ho nia, aproveita oportunidade hotu ne'ebé iha hodi koalia lia-loos ba ukun-nain sira.

Obrigada dala ida tan mai iha ne'e ohin, ha'u hakarak konvida Sekretáriu Estadu Adjuntu ba Asuntus Ázia Leste no Pasífiku, David Stilwell, hodi mai hamutuk ho ha'u atu entrega sertifikadus bolsa-estudu ba resepiante sira.

Ami nia Ofisiál Asuntus Públikus Caleb Portnoy sei bolu sira ne'ebé simu bolsa-estudu...

Parabéns ba ita-boot sira hotu. No tuir mai ha'u hakarak konvida Sekretáriu Estadu Komunikaun Sosiál hodi hatoo diskursu badak ida.